



1 4
1555
220

221



門 14
號 1555
卷 220

夢梁錄卷十

諸官舍

錢塘 吳自牧 著

左右丞相參政知樞密院使簽書府俱在南倉前大渠
口侍從宅在都亭驛東臺官宅在油車巷省府官屬宅
在開元宮對牆卿監郎官宅在俞家園七官宅在郭婆
井五官宅在仁美坊三官宅在潘闡巷一官宅在舊睦
親坊六房院即後省官所居處在湧金門東如意橋北
五房院即樞密院諸承旨所居處在楊和王府西也

夢梁錄卷十

四月十九日

府治

臨安府治在流福坊橋右州橋左首亭扁曰奉詔亭右首亭扁曰迎春左入近民坊巷節推察判二廳次則左司理院出街右首則右司理院府院及都總轄房入府治大門左首軍資庫與監官衙右首帳前統制司次則客將客司房轉南入簽廳都門係臨安府及安撫司僉廳有設廳在內僉廳外兩側是節度庫鹽事所給關局財賦司牙契局戶房將官房提舉房投南教場門側曰香遠閣閣後會茶亭閣之左是見錢庫分使庫搭材親

兵使馬等房再出僉廳都門外投西正衙門俱廊俱是兩司點檢所都吏職級平分點檢等房正廳例帥臣不會坐蓋因皇太子出判于此臣下不敢正衙坐正廳後有堂者三扁曰簡樂清平見廉堂後曰聽雨亭左首誦讀書院正衙門外左首曰東廳每日早晚帥臣坐衙此治事廳後有堂者四扁曰恕堂清暑有美三桂東廳側曰常直司曰點檢所曰安撫司曰竹山閣曰都賞公使三庫庫後有軒扁曰竹林軒之後堂扁曰愛承化講易三堂堂後曰牡丹亭東廳右首曰客位左首

日六局房祇候書表司親事官虞候授事等房而已府治外流福井對及仁美坊三通判安撫司官屬衙居焉府治前市井亦盈鋪席甚多蓋經訟之人往來駢集買賣要鬧處也

運司衙

西浙運司衙舊在雙門北爲南北二廳今遷豐豫門南渡子橋西普安橋爲東西二衙曰東衙有寬民堂福星樓節愛堂振襟堂堂側建別榭曰西衙有周咨堂公生明堂繡春堂仁惠堂堂後栽脩竹而圍之運司僉廳提

領犒賞酒庫所俱在運司衙門主管文字幹辦公事在俞家園主管帳司廳在戒子橋之北

后戚府

昭慈聖獻孟太后宅在後市街顯仁章太后宅在薦橋東憲節邢皇后宅在薦橋南憲聖慈烈吳太后宅在州橋東成穆郭皇后宅在佑聖觀後成恭夏皇后宅在豐樂橋北成肅謝皇后宅在豐禾坊南慈懿李皇后宅在後市街恭淑韓皇后宅在軍將橋恭聖仁烈楊太后宅在漾沙坑壽和聖福謝太后宅在龍翔宮側全皇后宅

在豐禾坊南其后戚宅元各賜家廟五室及祭器儀物
每四孟祭享官給以御膳兵治祭饌太常寺差奉常官
行贊相禮仍差主管官影堂使臣及兵級守之以子孫
世領祠事

諸王宮

吳王府在後洋街益王府在新橋秀安僖王府在後洋
街漢王府在西橋莊文太子府在井亭橋沂靖惠王府
在清湖北景獻太子府在鐵冶嶺榮文恭王府在佑聖
觀橋東周漢國瑞孝長公主府在左藏庫西各賜家廟

祭器歲時祭禮及影堂使臣主奉官兵級等循戚宅前
制行之矣

家廟

忠烈張循王府在清河坊賜廟祀循王以上五世祖頒
祭器法式聽其自造仍差主管一員影堂使臣二員兵
級二十七名以子孫帶領祠事忠武韓蘄王府在前洋
街賜廟祀頒祭器惟賜銅爵勺各一餘竹木頒圖式聽
其自製一應事儀如前制行忠勇劉鄴王府在明慶寺
南建廟賜祭器並如前式忠烈楊和王府在洪橋清河

坊賜家廟與祭器下將作監造以賜歲時行禮官給廚
兵太常遣贊相以奉常餘皆如前制行太傅平章魏國
公賈秋壑按舊典賜第及家廟在葛嶺集芳園改建廟
奉五室同宇以饗四孟月祭器皆尚方所賜凡點領官
吏洒掃兵士與花果月頒之隸版曹及京兆府如在京
賜諸勲功廟儀式奏行

館驛

樟亭驛卽浙江亭也在跨浦橋南江岸凡宰執辭免名
出居此驛待報定向有白樂天先生往驛訪楊舊曾賦

詩曰往恨今愁應不殊題詩梁下又踟躕羨君猶夢見
兄弟我到天明睡亦無夜半樟亭驛愁人起望鄉月明
何處見潮水白茫茫北郭驛亭在餘杭門外北郭稅務
之右都亭驛在候潮門裏泥路西侍從宅側次爲館伴
外國使人之地也

本州倉場庫務

鎮城倉常平倉糯米倉俱在餘杭門外師姑橋鹽事所
都鹽倉在艮山門外天宗鹽倉在天宗水門內所轄諸
鹽場十有二曰湯鎮仁和許村鹽官南路茶槽錢塘新

興蜀山巖門上管下管等場又新興以下五場西興錢
清二場皆隸 交木場在龍山抽解竹木場在浙江亭
北又三場在江漲橋南餘杭塘上西溪三路也城內外
場共二十有一處以便諸官廳及民庶排日發賣鐵場
炭場船場鑄冶場在東青門外北瓶場糴場在餘杭門
外賣酒局在豐儲倉邊家渡之東交錢局在府治後都
錢庫激賞庫軍資庫常平庫公使錢庫公使酒庫甲仗
庫書版庫公使醋庫俱在州衙內回易庫在薦橋北外
有公使醋子庫于城內外十有一庫耳或自沽賣止日

納息錢于點檢所樓店務在流福橋北有官設吏令宅
務合于人員收檢民戶年納白地賃錢稅務凡五處名
曰都稅務浙江稅務龍山稅務北郭稅務江漲稅務但
州府雖有稅務之名則朝家多有除放以便商賈諸貨
壅于杭城其都作院在白魚池之側運司亦有木稅場
在杭城外共八場也船場與架閣庫俱在薦橋門外提
領犒賞酒庫所在樓店務之側

點檢所酒庫

點檢所官酒庫各庫有兩監官下有專吏酒匠掌其役

但新煮兩界係本府關給工本下庫醞造所解利息聽
充本府贍軍激賞公支則朝家無一毫取解耳曰東庫
清煮俱爲一在崇新門裏有酒樓名之曰太和廢之久
矣曰西庫又名金文正庫清界庫在三橋南惠遷橋側
煮界庫在湧金門外有酒樓扁之曰西樓南庫元名昇
陽宮煮界庫在社壇南新界庫在清河坊南酒樓扁之
曰和樂北庫煮界庫在祥符橋東清界庫在鵝鴨橋東
酒樓扁之曰春風日中庫在衆樂坊北造清界有酒樓
扁之曰中和煮庫在井亭橋北曰南上庫呼爲銀甕子

庫煮酒庫在東青門外造清界庫在睦親坊北酒樓扁
之曰和豐南外庫造清界庫在便門外清水關造煮界
庫在嘉會門外名之曰雪醅庫北外庫造煮界庫在江
漲橋南清界庫在左家橋北酒樓扁之曰春融西溪庫
清煮兩界俱在九里松大路乃一門分兩庫耳天宗庫
造清界在天宗水門裏煮界庫在餘杭門外上關東赤
山庫造清界庫在赤山教場煎煮庫在左軍教場側崇
新庫清煮兩界俱在崇新門外徐村庫在六和塔南徐
村市中其諸庫皆有官名角妓就庫設法賣酒此郡風

流才子欲買一笑則徑往庫內點花牌惟意所擇但恐酒家人隱庇推托須是親識妓面及以微利啗之可也又有九小庫如安溪餘杭奉口解城鹽官長安許村臨平湯鎮更有碧香諸庫如錢塘門外上船亭南名爲錢塘正庫有樓扁曰先得錢塘縣前名錢塘前庫鵝鴨橋北曰北正庫正在醋坊巷口也西橋東曰煮碧香庫禮部貢院對河橋西曰藩封棧庫外有藩封正庫在常州無錫縣並隸臨安府點檢酒所提領耳

安撫司酒庫

安撫司所管一道酒庫如餘杭縣閑林酒庫石瀨步東西二酒庫臨安縣青山桃源二酒庫外有安吉州德清縣市名爲德清正酒庫五林鬧市處曰德清東西二酒庫安吉州歸安縣曰璉市東西二酒庫嘉興府華亭縣曰上海酒庫

廂禁軍

臨安居輦轂之下蓋倚以爲重武備一日不可弛闕而守帥所統則建炎之舊制至防隅一軍又必藉禁衛之士別爲部伍三衙之兵亦聽帥臣節制以倡率之姑以

兵制軍號一一述之使知兵衛各有所統耳曰東南第
三將自太祖朝分隸駐劄寨在東青門內元管十指揮
後撥威果二十八指揮雄節九指揮于平江外見存者
威節第一第四第五第六指揮雄節第八第十六指揮
全捷第二第三指揮共統八指揮軍也曰京畿第三將
元係東京畿縣陳畱雍邱尉氏鄆陵陽武屯駐兵後劉
俊統率來捕陳畱存畱駐劄營在東青門裏所統武騎
兩指揮勇廣四指揮廣捷三指揮忠節水軍驍猛神威
雄勇雄威各管一指揮効忠三指揮共統十七指揮軍

也曰兵馬鈐轄司兵馬勇節威果全捷三指揮宿州龍
騎歸遠二指揮因討睦寇畱屯隸鈐轄司所管矣曰廂
軍崇節捍江脩江都作院小作院清湖開湖司北城
堰西河廣濟樓店務長安堰閘秤斗務北城鼓角匠橫
江水軍船務牢城各指揮兵士計一萬五百八十七名
之額曰城東城西外沙海外管界茶槽南蕩東梓上管
赭山仁和鹽官黃灣硤石奉口許村巡檢司十六寨計
兵卒一千三百四十四名之額

防隅巡警

臨安城郭廣闊戶口繁夥民居屋宇高森接棟連簷寸
尺無空巷陌壅塞街道狹小不堪其行多爲風燭之患
官府坊巷近二百餘步置一軍巡鋪以兵卒三五人爲
一鋪遇夜巡警地方盜賊烟火或有鬧炒不律公事投
鋪卽與經廂察覺解州陳訟更有火下地分遇夜在官
舍第宅名望之家伏路以防盜賊蓋官府以潛火爲重
于諸坊界置立防隅官屋屯駐軍兵及于森立望樓朝
夕輪差兵卒卓望如有烟燧處以其幟指其方向爲號
夜則易以燈若朝天門內以旗者三朝天門外以旗者

二城外以旗者一則夜閒以燈如旗分三等也曰東隅
有望樓在柴堞橋都稅務南曰西隅有望樓在白龜池
曰南隅有望樓在吳山至德觀後曰北隅有望樓在潘
闔巷內曰上隅有望樓在大瓦子後三真君廟前曰中
隅有望樓在下中沙巷蠟局橋東堍曰下隅有望樓在
脩文坊內曰府隅有望樓在府治側左院牆邊曰新隅
在長慶坊曰新南隅在候潮門裏東曰新北隅在餘杭
門裏曰新上隅在侍郎橋東皮場廟側曰西南隅在壽
域坊仁王寺前曰南上隅在麗正門側儀鸞司相對曰

城西隅在錢湖門外清化橋曰城北上隅在北郭稅務橋曰東北下隅有望樓在北新橋北曰錢塘隅有望樓在水磨頭放生亭後曰新西隅在九里松麴院路口曰海內隅在浙江亭南油局曰外沙隅在候潮門外外沙巡司曰城東隅在新門外城東巡司曰茶槽隅在東青門外茶槽巡司如遇烟燧救撲帥臣出于地分帶行府治內六隊救撲將佐軍兵及帳前四隊親兵隊搭材隊一併聽號令救撲並力撲滅支給犒賞若不竭力定依軍法治罪

帥司節制軍馬

浙西安撫司節制殿步兩司軍校雖係帥司節制元無統屬遇有速欲調遣及救撲烟燧須伺朝旨調遣常不及事遂請于朝省得旨行下殿步兩司各差官兵千人各委統制官二員帶行正任兵馬鈐轄都監及添差兵馬鈐轄副都監職任于城內四壁置隅以備調遣復請朝堂欲再于殿步二司差軍兵分任城外四壁防虞之責遂行下各司再選精軍三百人各以統制官二員仍帶本州鈐轄路分之職分任也並照城內四壁約束俱

隸帥司節制自後兩浙運司申朝得旨令分官城內外
四壁軍兵通行節制以便救撲且如防虞器具桶索旗
號斧鋸燈籠火背心等器具俱是官司給支官錢措置
一一俱備遇有救撲百司官吏俱整隊伍急行奔馳駐
劄遺漏地方聽行調遣不勞百姓餘力便可撲滅如宰
執帥漕殿步帥臣聞到地面指揮救撲百司官吏亦各
詣所隸官司守局以備不測其脩內司搭材等兵級亦
同內侍分頭救滅或火勢侵及官舍戚里之家及燧燼
畏威有傷百姓屋廬內庭累令大使馭馬傳宣諸司帥

臣速令將佐兵士撲滅毋致違慢如有違誤定行軍法
治之帥漕二司遇行救撲官捨錢買水澆滅富室豪戶
亦喝錢助役軍士盡力撲滅不致疎虞若救火軍卒重
傷者所司差官相視傷處支給犒賞差醫診治

夢梁錄卷十

Blank page with vertical lines, likely a separator or a page with very faint text.

夢梁錄卷十一

錢塘 吳自牧 著

諸山巖

大內坐山名鳳凰卽杭客山也廟巷山名吳山又曰胥
山上方多福寺名七寶山山前連者謂之寶蓮山進奏
院後名石佛山太廟後名瑞石山妙果尼寺前名金地
山漾沙坑小山名茆山淺山寶月寺前名寶月山八眼
井前名峨嵋山草場山御廚營山謂之寶山孝仁坊名
清平山府治名竹園山秀峰諸山一脈耳豐樂橋南有

狗兒山此古老相傳稱之而實無山跡東太乙宮後圃
內有小土山名虎林山建亭在其上扁曰武林卽杭之
主山也城南冷水峪上名曰包山有桃花關多貴官園
圃春開桃花數里艷色如錦杭人遊宴甚夥嘉會門外
泮泮橋南名龍山又曰天龍山山西名月輪大慈二山
低處名馬鞍五雲等山鐵井欄謂之定山秦望山浮山
范村北鄉名排山楊村名巘山巫山頭名廟山又謂之
椽山水樂洞前名南高峯山九里松名靈隱山靈茆山
仙居山靈隱寺後山名北高峯山寺前名飛來峯白猿

峯稽畱峯月桂峯蓮華峯漣巖巉巖靈鷲寺右青林巖
理公巖靈隱山南名葛塢朱墅女兒山玉女巖龍井山
雲栖山范村諸塢山西湖堤上名孤山乃林和靖先生
隱居處其山聳立傍無聯附爲湖山之絕勝也錢塘界
有粟山縣舊治南名巨石山石甌山壽星寺後巾子峯
山大佛寺名大佛石山張真君行宮前名霍山興教寺
後曰南屏山其山怪石聳秀中穿一洞上有石壁如屏
障可愛司馬溫公書家人卦刻之于石見存其跡矣淨
慈寺對山名雷峯寺山後有慧日峯山龍井山側名雞

龍山高麗惠因寺前名赤山更有一峯聳出衆山繚繞
古木列垂森翠難描謂之玉岑山也報德寺有山名鷓
雞峯無垢院有一峯如筆卓然而立故名卓筆峯大麥
嶺後花家山又名蛇山放馬場側靈石山東山又名仙
姑山王家橋試院後名西觀音山秦亭山石壁山西溪
龍門山長壽鄉大悲山塢崇化鄉觀山黃莊茆滌楊梅
等山城東北山臨平山桐扣山赤岸山臯亭山青龍山
母山佛石山石膏山大婆山白巖山方山苧山楊山唐
峯山近山大遮山鳥尖山飲馬山安樂山石壁山龍駒

山法華山仁和縣界東北有黃鶴山永和等鄉超山亭
市龍珠山大旗山南北南鮑山五峯山洛山蛾眉山烏
頭山姥獨山赭石山馬嘍山其餘七縣山脈繚複峯巒
巍峩週圍數百里難以盡述矣虎頭巖在錢塘門外介
于寶巖定業寺後山崑澧錢塘帝都賦云巖則虎頭故
老傳云此山舊有巖石突出如虎頭形吳越錢王納土
後奏有望氣云杭州西湖有虎頭形勝遂命匠鑿去其
形兩赤縣有名巖者如連巖青林巖理公巖玉女巖象
鼻巖佛手巖

嶺

八蟠嶺在大內後殿司衙山上萬松嶺在和寧門外孝仁坊西嶺上夾道栽松今第宅內官民居高高下下鱗次櫛比多居于上白樂天夜歸賦詩有萬株松樹青山上十里沙堤明月中之句又東坡蠟梅詩有萬松嶺下黃千葉之句鐵冶嶺在步司衙左虎翼營東紫坊嶺在漾沙坑七官宅之側駱駝嶺在三茆觀之麓灌肺嶺在大街清河坊北狗兒嶺在教睦坊內此二嶺舊有坡阜今夷爲坦路而名存焉慈雲嶺西在方家峪東往郊壇

路有後唐石刻風篁嶺在錢塘門外放馬場西路通龍井其嶺最高峻嶺上有亭名曰過溪又曰二老東坡賦詩紀之又探梅詩有問訊風篁嶺下梅又有界亭詩丹青明滅風篁嶺之句分金嶺在錢塘舊治西狗頭嶺在舊治北梯子嶺在方家峪南錢糧司嶺在城西巡司前五子嶺在龍山之北白塔嶺在龍山之東徐村嶺俗呼薑擦子嶺雷嶺牛馬頭嶺俱在錢塘定山北鄉牌山嶺在定山南鄉五雲山嶺在徐村及雲栖山俱可往來大麥嶺小麥嶺今在高麗寺西與步司右軍相連路通坊

馬場嶺嶺有觀音閣對山有東坡同王渝楊傑張鑄元
祐五年三月三日遊三竺過麥嶺題名石刻存焉南高
峯下煙霞嶺葛嶺在西湖之西葛仙翁煉丹于此有初
陽臺高廟卽其地創集芳園理廟以此園賜賈秋壑建
第宅家廟蓋賈公有別墅在焉棲霞嶺又名劍門嶺
亦名劍門關在錢塘門外顯明院之北舊多栽桃花開
時爛然如霞故名之嶺下岳鄂王墓馳巘嶺在九里松
東巘脂嶺在九里松麴院路西石人嶺又名馮公嶺在
靈隱寺西去半里許又有大青嶺在東墓嶺南郎當嶺

在青嶺南黃泥嶺行春橋水竹塢步司前軍寨南
胡家嶺在錢塘長壽鄉其嶺極峻峭有石井旱不涸歌
樵嶺在慈山大石姥嶺在仁和界

諸洞

城內有洞者三青衣洞在三茅觀之後曰羅漢洞在
令所北其洞廢塞已久今仍呼其名曰金星洞在鳳
巖山介乎下太廟亦有洞如其名也城外有洞者凡一
十有七口南高峯煙霞洞下曰水樂洞其洞前四望林
石聳秀巖石笋峙洞虛窈渟涵如淵泉味且清甜可掬

洞中水聲如金石之音頃爲楊和郡王別圃鑿石築亭
取爲幽雅歲時都人遊觀集焉歷年多蕪穢弗治水樂
聲幾絕賈秋壑以 得之增葺其景顧無水音秋
俯睨旁聽悠然有契 谷虛而後能應水激而後能
聲今水滫其中土壅其外欲振聲得乎亟命流壅導
月聲自洞開出節奏自然二百年勝槩于今如始也
楊村巘山慈嚴寺之後名風水 外臺天真院有二洞
扁曰登雲曰靈化東坡和靖題 于石右赤山殿司
左軍寨尼菴側有洞名鐵窻楞洞天竺山有三洞名呼

猿龍泓煙霞石塢路大仁院有石屋洞極高大狀如屋
周圍鐫刻諸佛菩薩羅漢之像其寺正爲佛殿朝香夕
燈之供烏塢山名煙霞洞石屋寺側曰棲霞洞下竺寺
內有洞名香林臨平山有洞名龍洞尼菴後有洞名蝠
蝠洞細礪洞錢塘崇化坊有白龍洞其洞有龍居焉朝
家曾祈雨賜有感敕封侯爵爲顯靈孚濟美號賜廟額
曰敏應掃帚塢護國仁王寺有洞不載其名仁和界超
山有洞名海雲洞倏時乾濕建 紫龍王祠祀之古柳林
楊和王園內名白雲洞蓋以坡地擁土成之此奪天之

奇巧也

溪潭澗浦

杭郡係南渡駐蹕于此地倚山林抱江湖多有溪潭澗浦繚繞郡境實難描其佳處自武林山之西名曰西溪頃者有郭祥正詩題詠曰西溪在湖外一派濯殘陽遊子託漁艇却愁歸路長九溪在赤山煙霞嶺西南通徐村出大江北達龍井安溪在錢塘去北關五十里溪上有大遮山祠龍山在上古人相傳風雨之夕龍現珠凌溪在錢塘長壽奉口溪在錢塘安溪之北十八

里潭者寶月山寶月寺之西曰黑龍潭其潭莫測深淺亢旱不竭一名天井山下有天井巷晴則潭水碧色可愛將雨則水黑郡民于此候晴雨多驗唐守白樂天曾祭龍神撰祝文曰惟龍其色元其位坎其神王癸與水通靈日者歷禱四方寂然無應今故虔誠潔意致命于黑龍龍無水顧何依神無靈將恐竭澤能救物我寔有望于龍物不自神龍豈無求于我若三日之內雨一滂沛是龍之靈亦人之幸禮無不報神其聽之仁和臨平鎮東湖曰白龍潭漁浦潭按今輿地志在郡西南龍

遊潭在仁和臯亭山鉢盂潭在南高峯及仁和大年鄉
石塘東玉兒潭在郡西五十里浣紗潭在仁和臨平鄉
羊鐵潭在良山門外西湖三潭古人相傳在湖中

浦者考鳳凰山下有柳浦咸淳志云隋志置郡晉吳喜
嘗游軍此地參之諸文無考便門側名鐵幢浦古人相
傳吳越王射潮箭所止處立鐵幢又聞錢王築塘時高
下置鐵幢凡三以爲鎮壓潮水退則見其幢也淳祐戊
申帥司買民地置亭其上王荆公詩云憶昨初爲海上
行日斜來往看潮生如今身是西歸客迴首山川覺有

情靈隱浦自靈隱山南徂東臨浙江一派謂之北浦今
資國院前是也亦云靈隱步頭有詩咏曰有靈何所隱
深浦老蒹葭漁父一舟泊却疑秋漢槎白石浦鮮船渡
浦楊村浦俱仁和臨江鄉 澗者如合澗在靈隱天竺
之閒十八澗在龍井山之西步司左軍寨後路通六和
塔寺石門澗參軍陸羽靈隱寺記舊有臥龍石橫澗中
有詩咏曰啓閉何人見湍流一澗分仙家無路入空鎖
石樓雲金沙澗在靈隱寺側自合澗橋繞寺山一帶唐
家衛石橋在軍寨門內至行春橋折入步司前軍寨門

由麴院流入西湖惠因澗在赤山高麗惠因寺側秦少
游遊龍井曾濯足于澗題名記之云並湖而行出雷峯
度南屏濯足于惠因澗入靈石塢得支徑上風篁嶺憩
于龍井亭酌泉投石而飲之呼猿澗在靈隱山呼猿洞
之左右也

井泉

杭城內外民物阜蕃列朝帥臣常命工開撩井泉以濟
邦民之汲庶無枯涸之憂吳山北大井曰吳山井蓋此
井係吳越王時有韶國師始開爲錢塘第一井山脈融

液泉源所鍾不雜江湖之水遇大旱不涸天井巷舊有
曰天井舊志云寶月山上亦有天井後廢之久矣萬松
嶺上沈婆井嶺下有郭公井鐵冶嶺北有郭婆井青不
山側有郭兒井壽域坊仁王院前上四眼井長慶坊竹
竿坊巷曰下四眼井金地山步司寨前名白鱗井青沙
灣有鰻井寶月山下上八眼井祕書省相對下八眼井
後市街大眼井六部前甜瓜井四方館北及南倉前各
有大井太學後及市西坊各名沈公井祥符寺中向吳
越王于寺內開井九百九十眼後改創軍器所墜塞僅

存數井耳薦橋北有義井亦呼四眼井道明橋雙井豐
樂橋西長惠井棚前亦有雙井梵天寺靈鰻井錢王廟
前烏龍井六和塔南沙上曰沙井上以鐵井欄護之西
溪有井名龜兒井方井淨慈寺前四眼井下竺藏院煉
丹井武林山烹茗井清湖惠利井鐵冶嶺相公井甘泉
坊相國井安國羅漢寺名西井又名成化井三省激賞
庫名四井坊俗呼四眼井裴府前名小方井俗呼小眼
井惠遷橋西有井一而三名曰沈公井曰金牛井曰惠
遷井州治前流福坊名流福井湧金門鑷子井自惠利

而鑷子計八井于西湖置水口引水歸城使民汲之孤
山有金沙井風篁嶺龍井有名賢題詠甚多秦少游題
名石刻丞相鄭清之跋東坡之記存焉治平寺葛公雙
井楊村路上觀音井小林蓮華院蓮華井仁和臯亭馮
氏井 泉者以城外兩赤縣有冷泉醴泉溫泉並見武
林山玉泉在錢塘九里松北淨空院齊末有靈悟大師
雲超開山說法龍君來聽撫掌出泉有小方池深不及
丈水清徹可鑿異魚游泳其中池側立祠祀龍君朝家
封公爵白樂天有詩云湛湛玉泉色悠悠浮雲身閒心

對定水清淨兩無塵手把青藜杖頭戴白綸巾興盡下山去知我是誰人眞珠泉在大慈崇教院爲張循王眞珠園內也靈泉在壽星寺前有亭而廣福院亦有之金沙泉在仁和永鄉東坡詩有細泉幽咽走金沙之句盃泉詳于壽星寺臥犀泉見于鄭戩靈隱天竺詩序中蕭公泉在靈隱寺後歲寒泉在龍井山崇因院法華泉在南山滿覺寺參寥泉元祐年間此僧住上智果寺寺有泉東坡以僧之名爲泉名蓋東坡應夢記云僕在黃州日參寥自吳中來訪一日夢此僧賦詩覺而記兩句

云寒食清明都過了石泉槐火一時新後七年僕出守錢塘此僧始卜居西湖智果院院有泉出石縫閒寒食之明日僕與客泛湖自孤山來謁參寥子汲泉鑽火烹黃蘗茶忽悟予夢詩兆于七年前衆客皆嘆遂書始末并題之非虛語也潁川泉在南高峯觀音泉者有三法通傳燈眞如三寺也噴月泉在南山晴竹園廣福院定光泉在西山長耳僧法相院西定光菴側白沙泉在靈隱寺西普賢院方丈之西其泉自白沙中出有詩詠曰不見泉來穴沙平落細聲夜高寒月漾銀漢大分明周

公泉又名北牖泉在湖州市下閘甘泉在城北童家巷
南惠泉在錢塘長壽鄉大遮山惠泉寺水谷泉在臨平
山寂光菴側寒泉舊名薦菊泉在錢塘門外嘉澤廟生
綠泉在南山福聖院六一泉僕夫泉在孤山四聖太乙
道館園內大悲泉在上天竺茯苓泉在靈隱寺西無垢
院虎跑泉在大慈山持正泉在六和開化寺湧泉在霍
山行宮西清心院前山坡下高廟日遣人汲泉入內淪
茗寺中以朱欄護之味極清甘亢旱不竭天澤泉在麴
院小隱寺前有亭覆之安平泉在仁和安仁西鄉安隱

院有池扁曰安平泉池邊有亭東坡詩曰策杖徐徐步
此山撥雪尋徑興飄然鑿開海眼知何代種出菱花不
記年烹茗僧誇甌泛雪煉丹人化骨成仙當年陸羽空
收拾遺却安平一片泉城內有瑞石泉在料糧院北瑞
石山下今太廟南有井亭青衣泉在太廟後三茅觀園
內武安泉在皇城司營水清甘有石刻武安泉三字俱
按咸淳志所載而述之也

池塘

湧金池在豐豫門裏引西湖水爲池吳越王元瓘大書

湧金池三字刻石識之其旁書清泰三年丙午之歲建
午之月特開此池有前輩賦詩詠曰湧金春色晚吹落
碧桃花一片何人得流經十萬家眾沼皆涵碧斯池獨
湧金寶光終夜見不是月華深聖母池在吳山中興觀
側以石欄護之上建聖母廟白龜池在錢塘門裏沿城
南金牛池已廢仁和倉池在倉南明清池在大理寺議
廳池畔有潘閩詩刻白洋池在梅家橋南鴻雁池在龍
山北龍母池在錢糧司嶺金魚池在開化寺後山澗水
底有金銀魚放生亭池在西湖德生堂瑤池在錢塘門

外寶勝寺側今屬呂氏園有二飲馬池一在西溪飲馬
山下一在菜市門外廟子灣西水池在長橋東錢湖門
外碧沼水池在湖州市左八郎廟巷池廣三畝水清甘
人多汲飲有扁曰碧沼磨劍池臨平山下有片石俗傳
錢王磨劍于此宮城外護龍水池二十所自候潮門裏
南貼中軍寨壁宮城之東直至便門裏南水門北和寧
門外水池袤一百一十尺自是近南居民去水絕遠者
皆恃此防虞以為安矣城內外居民水遠去處官置防
虞水池者二十有二以便民之利 塘者如艮山門外

射司衙側名五里塘長山門外蔡官人塘月塘其地宜
種瓜有周姓者擅其利土人呼月塘周家筭筒瓜是也
上塘在殿司右軍教場側又在團園頭石塘北沈塘在
北關門外又名沈家灣永和塘在仁和永和鄉地接石
鼎湖白龍潭俗謂之三里陰水勢漲溢一遇卯風震蕩
則數百頃瞬息湮沒鄉民患之後得邑士倡義捐財以
助修築塘成歲無水患邑宰范光命名曰永和堤官河
塘在北新橋之北接廣運河大塘又有一塘曰西塘表
二十八里抵安溪通四州驛路淳祐並加築治至今無

頽圯之患矣

堰閘渡

清河堰在餘杭門外稅務東裏沙河堰在餘杭門外仁
和橋東 澄水閘在西湖長橋南因錢湖門內諸山之
水分流爲三道一以錢湖門外北城下置海子口流水
省馬院後爲小渠引水直至澄水閘入湖又爲三渠出
于湖皆有石橋後渠爲民居湮塞然橋猶可記也西閘
在赤山教場側龍山渾水閘清水閘在龍山浙江清水
渾水二閘在便門外保安閘在小堰門外清湖土中下

三閘在餘杭門外石函橋閘在錢塘門外水磨頭因湖水漲壅開此泄水出于下湖安溪化灣二斗門閘在錢塘縣北 浙江渡在浙江 西興龍山渡在六和塔開化寺山下對漁浦漁山渡在大朱橋及鹽倉前兩岸相望不遠江勢可畏浙東士夫憚于渡漁浦者多由此渡船頭渡在通江橋北周家渡在城內漆木巷司馬渡在油蠟局橋蕭家渡在下中沙巷邊家渡在仁和倉東睦家渡在豐儲倉西時家渡在德勝堰南

夢梁錄卷十一

夢梁錄卷十二

錢塘 吳自牧 著

西湖

杭城之西有湖曰西湖舊名錢塘湖週圍三十餘里自古迄今號爲絕景唐朝白樂天守杭時再築堤捍湖宋慶歷開盡關豪民僧寺規占之地以廣湖面元祐時蘇東坡守杭奏陳于上謂西湖如人之眉目豈宜廢之遂撥賜度牒易錢米募民開湖以復唐朝之舊紹興閒輦穀駐蹕衣冠紛集民物阜蕃尤非昔比郡臣湯鵬舉申

明西湖條畫事宜于朝增置開湖軍兵差委官吏管領
任責蓋造寨屋舟隻專一撩湖無致湮塞修湖六井陰
竇水口增置斗門水閘量度水勢得其通流無垢汚之
患乾道年間周安撫淙奏乞降指揮禁止官民不得拋
棄糞土栽植荷菱等物穢汚填塞湖港舊名募軍兵專
一撩湖近來廢闕見存者止三十餘名乞再填剌補額
仍委尉司官并本府壕寨官帶主管開湖職專一管轄
軍兵開撩無致人戶包占或有違戾許人告捉以違制
論自後時有禁約方得開闢淳祐丁未大旱湖水盡涸

郡守趙節齋奉朝命開濬自六井至錢塘上船亭西林
橋北山第一橋蘇堤三塔南新路長橋柳洲寺前等處
凡種菱荷菱蕩一切薙去方得湖水如舊咸淳間守臣
潛皋墅亦申請于朝乞行除拆湖中菱荷毋得存畱穢
塞侵占湖岸之間有御史鮑度劾奏內臣陳敏賢劉公
正包占水池蓋造屋宇濯穢洗馬無所不施灌注湖水
一以醞酒以祀天地饗祖宗不得蠲潔而虧歆受之福
次以一城黎元之生俱飲汚膩濁水而起疾疫之災奉
旨降官罷職令臨安府日下拆毀屋宇開闢水港盡于

湖中除拆蕩岸得以無穢污之患官府除其年納利租
官錢銷滅其籍絕其所蒔本根勿復萌孽矣且湖山之
景四時無窮雖有畫工莫能摹寫如映波橋側竹水院
澗松茂盛密蔭清漪委可人意西林橋卽裏湖內俱是
貴官園圃涼堂畫閣高臺危榭花本奇秀燦然可觀有
集芳御園理宗賜與賈秋壑爲第宅家廟往來遊玩舟
隻不敢仰視禍福立見矣西泠橋外孤山路有琳宮者
二曰四聖延祥觀曰西太乙宮御圃在觀側乃林和靖
隱居之地內有六一泉金沙井閒泉僕夫泉香月亭亭

側山椒環植梅花亭中大書疏影橫斜水清淺暗香浮
動月黃昏之句于照屏之上云又有堂扁曰挹翠蓋挹
西北諸山之勝耳曰清新亭面山而宅其麓在挹翠之
後曰香蓮亭曰射圃曰瑪瑙坡曰陳朝檜皆列圃之左
右舊有東坡菴四照閣西閣鑑堂辟支塔年深廢久而
名不可廢也曰蘇公堤元祐年東坡守杭奏開浚湖水
所積葑草築爲長堤故命此以表其德云耳自西迤
北橫截湖面綿亘數里夾道雜植花柳置六橋建九亭
以爲遊人翫賞駐足之地咸淳間朝家給錢命守臣增

夢溪筆談卷十二
築堤路沿堤亭榭再一新補植花木向東坡嘗賦詩云
六橋橫接天漢上北山始與南屏通忽驚二十五萬丈
老葑席捲蒼煙空曰南山第一橋名映波橋西偏建堂
扁曰先賢寶歷年大資袁京尹歆請于朝以杭居吳會
爲列城冠湖山清麗瑞氣扶輿人傑代生踵武相望祠
祀未建實爲闕文以公帑求售居民園屋建堂奉忠臣
孝子善士名流德行節義學問功業自陶唐至宋本郡
人物許箕公以下三十人及孝婦孫夫人等五氏各
立碑刻表世旌哲而祀之堂之外堤邊有橋名袁公橋

以表而出之其地前挹平湖四山環合景象窈深惟堂
濱湖入其門一徑縈紆花木蔽翳亭館相望來者由振
衣歷古香循清風登山亭憩流芳而後至祠下又徙玉
晨道館于祠之良隅以奉洒掃易扁曰旌德且爲門便
其往來直門爲堂扁曰仰高第二橋名鎖瀾橋西建堂
扁曰湖山咸淳閒洪帥燾買民地剏建棟宇雄傑面勢
端閎罔巒奔赴水光滉漾四浮圖臺四圍如武士相衛
回眸顧盼由後而望則芙蓉菰蒲蔚然相扶若有遜避
其前之意後二年帥臣潛皋墅增建水閣六楹又縱爲

五
堂四楹以達于閣環之欄檻闢之戶牖蓋邇延遠挹盪
納十山萬景卓然爲西湖堂宇之冠遊者爭趨焉接第
三橋名望山橋側有堂扁曰三賢以奉白樂天林和靖
蘓東坡三先生之祠袁大資請于朝切惟三賢道德名
節震耀今古而祠附于水仙廟東廡則何以崇教化勵
風俗遂買居民廢址改造堂宇以奉三賢實爲尊禮名
勝之所正當蘇堤之中前挹湖山氣象清曠背負長岡
林樾深窈南北諸峯嵐翠環合遂與蘇堤貫聯也蓋堂
宇參錯亭館臨堤種植花竹以顯清槩堂扁水西雲北

月香水影晴光雨色曰北山第二橋名東浦橋西建一
小矮橋過水名小新堤于淳祐年間趙節齋尹京之時
築此堤至麴院接靈隱三竺梵宮遊玩往來兩岸夾植
花柳至半堤建四面堂益以三亭于道左爲遊人憩息
之所水綠山青最堪觀玩咸淳再行高築堤路凡二百
五十餘丈所費俱官給其券工也曰北山第一橋名涵
碧橋過橋出街東有寺名廣化建竹閣四面兼竹萬竿
青翠森茂陰晴朝暮其景可愛閣下奉樂天之祠焉曰
壽星寺高山有堂扁曰江湖偉觀蓋此堂外江內湖一

覽目前淳祐趙尹京重創廣厦危欄顯敞虛曠旁又爲
兩亭巍然立于山峯之頂遊人縱步往觀心目爲之豁
然曰孤山橋名寶祐舊呼曰斷橋橋裏有梵宮以石刻
大佛金裝名曰大佛頭正在秦皇纜舟石山上遊人爭
覩之橋外東有森然亭堂名放生石函橋西昨於眞
廟朝天禧年間平章王欽若出判杭州請於朝建也次
年守臣王隨記其事元祐東坡請浚西湖謂每歲四月
八日邦人數萬集于湖上所活羽毛鱗介以百萬數皆
西北向稽首祝萬歲紹興以鑾輿駐蹕尤宜涵養以示

渥澤仍以西湖爲放生池禁勿採捕遂建堂扁德生有
亭二一以濱湖爲祝網縱鱗之所亭扁泳飛一以枕山
凡名賢舊刻皆峙焉又有奎書戒烹宰文刻石于堂上
曰玉蓮又名一清在錢塘門外菩提寺南沿城景定閒
尹京馬光祖建次年魏克愚徙郡泊竹山閣改建于此
但堂宇爽闊花木森森顧盼湖山蔚然堪畫曰豐豫門
外有酒樓名豐樂舊名聳翠樓據西湖之會于峯連環
一碧萬頃柳汀花塢歷歷欄檻閒而遊橈畫舫棹謳堤
唱往往會于樓下爲遊覽最願以官酌喧雜樓亦臨水

弗與景稱淳祐年帥臣趙節齋再撤新創瓌麗宏特高
接雲霄爲湖山壯觀花木亭榭映帶參錯氣象尤奇縉
紳士人鄉飲團拜多集于此更有錢塘門外望湖樓又
名看經樓大佛頭石山後名十三閒樓乃東坡守杭日
多遊此今爲相嚴院矣豐豫門外有望湖亭三處俱廢
之久名賢遺跡不可無傳故書之使後賢不失其名耳
曰湖邊園圃如錢塘玉壺豐豫漁庄清波聚景長橋麋
樂大佛雷峯塔下小湖齋宮甘園南山南屏皆臺榭亭
閣花木奇石影映湖山兼之貴宅宦舍列亭館于水堤

梵刹琳宮布殿閣于湖山周圍勝景言之難盡東坡詩
云若把西湖比西子淡妝濃抹總相宜正謂是也近者
畫家稱湖山四時景色最奇者有十曰蘇堤春曉麴院
荷風平湖秋月斷橋殘雪柳浪聞鶯花港觀魚雷峯夕
照兩峯插雲南屏晚鐘三潭映月春則花柳爭妍夏則
荷榴競放秋則桂子飄香冬則梅花破玉瑞雪飛瑤四
時之景不同而賞心樂事者亦與之無窮矣

下湖

下湖在錢塘門外其源出于西湖一自玉壺水口流出

九曲沿城一帶至餘杭門外一白水磨頭石函橋開流出策選鋒教場楊府雲洞北郭稅務側合爲一流如環帶形自有二斗門豬泄之淳祐年西湖水涸城內諸井亦竭尹京趙節齋給官錢米命工自錢塘尉解北望湖亭下鑿渠引天目山水自餘杭河經張家渡河口達于漚水橋斗門凡作數壩用車運水經西湖庶得流通城中諸市民賴其利也林和靖艤石函因過下湖小墅賦詩曰平湖望不極雲氣遠依依及向扁舟泊還尋下瀨歸青山連石埭春水入柴扉多謝提壺鳥雷人到落

擘錢塘定山南鄉有名湖劉道真錢塘記云明聖湖在縣南一百步又仁和東十八里亦有此湖之名仁和縣東北十八里有湖名曰御息故老相傳秦始皇東遊暫息于此故以名之縣東長樂鄉曰臨平湖前輩夜汎湖賦詩曰素彩皓粲津孤舟入清曠已愛隔簾看還宜捲簾望隔簾捲簾當此時惆悵思君君不知三月平湖草欲齊綠場分映入長堤田家起處烏龍吠酒客醒時謝豹啼
上當蓮葉渚水塍新擘稻秧畦人間謾說多岐路咫尺神仙洞却迷仁和永和鄉有湖者二曰石橋

湖曰丁山湖天。外曰泛洋湖仁和長樂鄉像光湖
唐時湖中現三色光掘地得彌勒佛石像乃建寺及湖
名俱曰像光仁和桐扣山下名石鼓湖

浙江

浙江在杭城東南謂之錢江江內有浙山正居江中潮
水投山下曲折而行有若反濤水勢者以錢塘松江浦
陽爲三而不知浦陽在何地今富陽卽錢塘江其江自
古曰浙河見于莊子書中其爲東南巨浸昭昭也按吳
越春秋內傳云吳王賜子胥死乃取其尸盛以鴟夷之

革浮之江中子胥因隨流揚波依潮來往蕩激堤岸又
按越王外傳云越王賜大夫種死葬于西山之下一年
子胥從海上穿山脅而持種去與之俱浮于海故前潮
水潘侯者伍子胥也後重水者大夫種也恐此說荒誕
無稽不敢信以忠清廟記言之非誕也然諸家所說甚
多或謂天河激湧亦云地機翁張又以日激水而潮生
月周天而潮應或以挺空入漢山湧而濤隨析木大梁
月行而水大源殊派異無所適從索隱探微宜伸確論
大率元氣嘘吸天隨氣而張斂溟渤往來潮隨天而進

退者也蓋日者重陽之母陰生于陽故潮附之于日也
月者太陰之精水屬陰故潮依之于月也是故隨日而
應月依陰而附陽盈于朔望消于朏魄虛于上下弦息
于輝朏故潮有大小焉但月朔夜半子晝則午刻潮平
于地次日潮信稍遲一二刻至望日則潮亦如月朔信
復會於子午位若以每月初五二十日此四日則下岸
其潮自此日則漸漸小矣以初十二二十五日其潮交澤
起水則潮漸漸大矣初一至初三十五至十八六日之
潮最大銀濤沃日雪浪吞天聲若雷霆勢不可禦進退

盈虛終不失期且海門在江之東北有山曰赭山與龕
山對峙潮水出其間也盧肇潮論所謂夾羣山而遠入
射一帶以中投者是也若言狹逼則東自定海吞餘姚
奉化二江俾之浙江尤甚逼狹潮未聞其聲北望嘉興
太湖水闊二百餘里故商船舶隻怖于上潭惟泛餘姚
小江易舟而浮運河達于杭越蓋以下有沙潭南北之
隔碍洪波蹙遏潮勢矣

城內外河

茅山河東自保安水門向西過權貨務橋轉北過通江

夢溪筆談卷十二
橋一直至梅家橋舊德壽宮之東今宗陽宮有茅山河
因展拓宮基填塞及民戶包占雖存去水大渠流至蒲
橋後被修內司營填塞所不及故道今廢之久矣 鹽
橋運河南自碧波亭州橋與保安水門裏橫河過望仙
橋直北至梅家橋出天宗水門一派自仁和倉後葛家
橋天水院橋淳祐倉前出餘杭水門水道 市河俗呼
小河東自清冷橋西流至南瓦橫河轉北由金波橋直
北至仁和倉橋轉東合天水院橋轉北過便橋出餘杭
水門 清湖河西自府治前淨因橋過間轉北由樓店

務橋至轉運司橋轉東由渡子橋合湧金池水流至金
文庫與三橋水相合南至五顯廟後普濟橋水相合直
北由軍將橋至清湖橋投北由石灰橋至衆安橋又投
北與市河相合入鵝鴨橋轉西一派自洗麩橋至紀家
橋轉北由車橋至便橋出餘杭水門 城外運河南自
浙江跨浦橋北自渾水閘蕭公橋清水閘衆惠橋羅木
橋諸家橋轉西由保安寨至保安水門入城土人呼城
河曰貼沙河一名裏沙河 龍山河南自龍山渾水閘
由朱橋至南水門淤塞年深不通舟楫 外沙河南自

行車門北去繞城東過紅亭稅務前廢已螺螄橋東至
蔡湖橋與殿司前軍寨內河相合轉西過游弈寨前軍
寨橋至無星橋壩子橋河相合入艮山河沿城至泛洋
湖水轉北至德勝橋與運河相合 菜市河南自新門
外北沿城景隆觀後至章家橋菜市塘壩子橋入泛洋
湖轉北至德勝橋與運河合流 下塘自河南天宗水
門接沿橋運河餘杭水門接城中小河清湖河兩河合
于北郭稅務前由清湖堰開至德勝橋與城東外沙河
菜市河泛洋湖相合分為兩派一由東北上塘過東倉

新橋入大運河至長安間入嘉興路運河一由西北過
德勝橋上北城堰過江漲橋喻家橋北新橋以北入安
吉州界下塘河 新開運河在餘杭門外北新橋北通
蘇湖常秀潤等河凡諸路綱運及販米客舟皆由此達
于杭都 下湖河在漕水橋柴場北自策選馬軍寨壻
八字橋沿東西馬塍羊角埂上泥下泥橋直抵步司中
軍寨壻北一派自打水樓南折入左家橋河入江漲橋
河一派自八字橋西策選軍寨神勇寨步人橋至石塘
橋下折入餘杭塘河一派自西堰橋西溪山一帶至飲

馬山亦折入餘杭塘河 子塘河自北郭稅務驛亭下
直抵左家橋係下湖洩水去處 餘杭塘河在餘杭門
外江漲橋投西路至餘杭縣 奉口河自北新橋至奉
口大溪 前沙河在菜市門外太平橋外沙河北水陸
寺前入港可通湯鎮赭山巖門鹽場東坡嘗雨中督役
開湯村運鹽河賦詩曰居官不任事蕭散羨長卿胡不
歸去來滯留愧淵明鹽事星火急誰能恤農耕
鼓動萬指羅溝坑天雨助官政泣然淋衣纓人如鴨與
豬投泥相濺驚下馬荒堤上四顧但湖泓線路不容足

又與牛羊爭歸田雖賤辱豈失泥中行寄語故山友切
勿厭藜羹 後沙河在艮山門外壩子橋北 官塘河
在餘杭門外板橋西 蔡官人塘河在艮山門外九里
松塘姚斗門通河衛店湯鎮赭山 施何村河在桐扣
山水澆堰東自運河入通裏外沙河 赤岸河在赤岸
自運河入通高塘橫塘諸河 方興河在臨平錢東自
運河入通像光湖赭山湯鎮

湖船

杭州左江右湖最爲奇特湖中大小船隻不下數百舫

有一千料者約長二十餘丈可容百人五百料者約長十餘丈亦可容三五十人亦有二三百料者亦長數丈可容三二十人皆精巧創造雕欄畫楹行如平地各有其名曰百花十樣錦七寶鉞金金獅子何船劣馬兒羅船金勝黃船董船劉船其名甚多姑言一二更有賈秋壑府車船船棚上無人撐駕但用車輪腳踏而行其速如飛又有御舟安頓小湖園水次其船皆是精巧雕刻創造俱用香楠木爲之只是周漢國公主遊翫曾一用耳靈芝寺前水次有趙節齋所造湖舫名曰烏龍凡遇

撐駕卽風波大作坐者不安多不敢撐出以爲

中南北搬載小船甚夥如撐船賣買羹湯時菓掇

如青碧香思堂春宣賜小思龍游新煮酒俱有及世

蔬水果船撲時花帶朵糖獅兒諸色千千小段兒糖小

兒家事兒等船更有賣雞兒湖瀝海蜚螺頭及點茶供

茶果婆嫂船點花茶撥糊盆潑水棍小船漁莊岸小釣

魚船湖中有撇網鳴榔打魚船湖中有放生龜鼈螺蚌

船並是瓜皮船也又有小腳船專載賈客妓女荒鼓板

燒香婆嫂撲青器唱耍令纏曲及投壺打彈百藝等船

多不呼而自來須是出著發放支犒不被哂笑若四時
遊翫大小船隻僱價無虛日遇大雪亦有富家翫雪船
如二月八及寒食清明須先指揮船戶僱定船隻若此
日分舫船非二三百券不可僱賃至日雖小腳船亦無
空閒者船中動用器具不必帶往但指揮船主一周
備蓋早出登舟不勞爲力惟支犒錢耳更有豪家富宅
自造船隻遊嬉及貴官內侍多造採蓮船用青布幕撐
起容一二客坐裝飾尤其精緻

江海船艦

浙江乃通江渡海之津道且如海商之艦大小不等大
者五千料可載五六百人中等二千料至一千料亦可
載二三百人餘者謂之鑽風大小八櫓或六櫓每船可
載百餘人此網魚買賣亦有名三板船不論此等船且
論舶商之船自入海門便是海洋茫無畔岸其勢誠險
蓋神龍怪蜃之所宅風雨晦冥時唯憑針盤而行乃火
長掌之毫釐不敢差誤蓋一舟人命所繫也愚屢見大
商賈人言此甚詳悉若欲船泛外國買賣則是泉州便
可出洋迤邐過七洲洋舟中測水約有七十餘丈若經

崑崙沙漠蛇龍烏豬等洋神物多于此中行雨上畧起
朶雲便見龍現全身目光如電爪角宛然獨不見尾耳
頃刻大雨如注風浪掀天可畏尤甚但海洋近山礁則
水淺撞礁必壞船全憑南針或有少差卽葬魚腹自古
舟人云去怕七洲回怕崑崙亦深五十餘丈又論舟師
觀海洋中日出入則知陰陽驗雲氣則知風色順逆
毫髮無差遠見浪花則知風自彼來見巨濤拍岸則知
次日當起南風見電光則云夏風對閃如此之類畧無
少差相水之清渾便知山之近遠大洋之水碧黑如澱

有山之水碧而綠傍山之水渾而白矣有魚所聚必多
礁石蓋石中多藻苔則魚所依耳每月十四二十八日
謂之大等日分此兩日若風雨不當則知一旬之內多
有風雨凡測水之時必視其底知是石等沙泥所以知
近山有港若商賈止到台溫泉福買賣未嘗過七洲崑
崙等大洋若有出洋卽從泉州港口至岱嶼門便可放
洋過海泛往外國也其浙江船隻雖海艦多有往來則
嚴婺衢徽等船多嘗通津買賣往來謂之長船等隻如
杭城柴炭木植柑橘乾濕果子等物多產於此數州耳

明越温台海鮮魚蟹養腊等貨亦上渾通于江浙但往來巖婺衢徽州諸船下則易上則難蓋灘高水逆故也江岸之船甚夥初非一色海舶大艦網艇大小船隻公私浙江漁浦等渡船買賣客船皆泊于江岸蓋杭城衆大之區客販最多兼仕宦往來皆聚于此耳

河舟

杭州裏河船隻皆是落腳頭船爲載往來士賈諸色等人及搬載香貨雜色物件等又有大灘船係湖州市搬載諸鋪米及跨浦橋柴炭下塘甄瓦灰泥等物及運鹽

袋船隻蓋水路皆便多用船隻如無水路以人力運之向者汴京用車乘駕運物蓋杭城皆石版街道非泥沙比車輪難行所以用舟隻及人力耳若士庶欲往蘇湖常秀江淮等州多僱舸船舫船飛篷船等或宅舍府第莊舍亦自創造船隻從便撐駕往來則無官府捉拏差撥之患若州縣欲差船隻多給官錢和僱以應用度杭城乃輦轂之地有上供米斛皆辦于浙右諸郡縣隸司農寺所轄本寺所委官吏專率督催米斛解發朝廷以應上供支用搬運自有綱船裝載綱頭管領所載

之船不下運千餘石或六七百石官司亦支耗券僱稍
船米與之到岸則有農寺排岸司掌拘卸檢察搜空又
有下塘等處及諸郡米客船隻多是鐵頭舟亦可載五
六百石者大小不同其老小悉居船中往來興販耳寺
觀菴舍船隻皆用紅油舳艫大小船隻往來河中搬運
齋糧柴薪更有載垃圾糞土之船成羣搬運而去北新
橋外趙十四相公府側有殿前司紅坐船于水次管船
軍士專造紅醞在船和沽官司寬大並無捉捕之憂論
之杭城輻輳之地下塘官塘中塘三處船隻及航船魚

舟釣艇之類每日往返曾無虛日緣此是行都士貴官
員往來商賈買賣駢集公私船隻泊于城北者夥矣

夢梁錄卷十三

吳自牧 著

兩赤縣市鎮

杭州有縣者九獨錢塘仁和附郭名曰赤縣而赤縣所
 管鎮市者一十有五且如嘉會門外名浙江市北關門
 外名北郭市江漲東市湖州市江漲西市半道紅市西
 溪謂之西溪市惠因寺北教場南曰赤山市江兒頭名
 龍山市安溪鎮前曰安溪市長山門外名范浦鎮市湯
 村曰湯村鎮市臨平鎮名臨平市城東崇新門外名南

土門市東青門外北土門市今諸鎮市蓋因南渡以來
杭爲行都二百餘年戶口蕃盛商賈買賣者十倍于昔
往來輻輳非他郡比也

都市錢會

銅錢乃歷代所用之寶漢唐以來天下通行宋朝開寶
中其錢文曰宋通元寶至寶元開則曰皇宋通寶近世
錢文皆著年號景定年鑄文曰景定元寶朝省因錢法
不通杭城增造鐵牌以便行用元都市錢陌用七十七
陌近來民間減作五十陌行市通使官司又印造會關

子自十五界至十八界行使至咸淳年間賈秋壑爲相
日變法增造金銀關子以十八界三貫準一貫關子天
下通行自因頒行之後諸行百市物貨湧貴錢陌消折
矣

團行

市肆謂之團行者蓋因官府回買而立此名不以物之
大小皆置爲團行雖醫小工役亦有差使則與當行同
也然雖差役如官司和僱支給錢米反勝于民間僱倩
工錢而工役之輩則歡樂而往也其中亦有不當行者

如酒行食飯行而借此名有名爲團者如城西花園泥路青果團後市街柑子團渾水團蒸團又有名爲行者如官巷方梳行銷金行冠子行城北魚行城東蟹行葦行菱行北猪行候潮門外南猪行南北土門菜行子橋鮮魚行橫河頭布行雞鵝行更有名爲市者如炭橋藥市官巷花市融和市南坊珠子市修義坊肉市城北米市且如橋園亭書房鹽橋生帛五間樓泉福糖蜜及荔枝圓眼湯等物其他工役之人或名爲作分者如碾玉作鑽捲作篋刀作腰帶作金銀打釵作裹貼作鋪

翠作裱褶作裝鑿作油作木作甄瓦作泥水作石作竹作漆作釘鉸作箍桶作裁縫作脩香澆燭作打紙作冥器等作分又有異名行者如買賣七寶者謂之骨董行鑽珠子者名曰散兒行做靴鞋者名雙線行開浴室者名香水行大抵杭城是行都之處萬物所聚諸行百市自和寧門杈子外至觀橋下無一家不買賣者行分最多且言其一二最是官巷花作所聚奇異飛鸞走鳳七寶珠翠首飾花朵冠梳及錦繡羅帛銷金衣裙描畫領抹極其工巧前所罕有者悉皆有之更有兒童戲耍物

件亦有上行之所每日街市不知貨幾何也

鋪席

杭州大街自和寧門杈子外一直至朝天門外清和坊南至南瓦子北謂之界北中瓦子前謂之五花兒中心自五閒樓北至官巷南街兩行多是金銀鹽鈔引交易鋪前列金銀器皿及現錢謂之看垛錢此錢備準權貨務算清鹽鈔引并諸作分打銀鑪鞴紛紜無數自融和坊北至市南坊謂之珠子市如遇買賣動以萬數又有府第富豪之家質庫城內外不下數十處收解以千萬

計向者杭城市肆名家有名者如中瓦前阜兒水雜貨場前甘豆湯戈家蜜棗兒官巷口光家羹大瓦子水果子壽慈宮前熟肉錢塘門外宋五嫂魚羹湧金門灌肺中瓦前職家羊飯彭家油靴南瓦子官家台衣張家元子候潮門顧四笛大瓦子邱家篋篋自淳祐年有名相傳者如貓兒橋魏大刀熟肉潘節幹熟藥鋪壩頭榜亭安撫司惠民坊熟藥局市西坊南和劑惠民藥局局前沈家張家金銀交引鋪劉家呂家陳家綵帛鋪舒家紙劄鋪五閒樓前周五郎蜜煎鋪童家柏燭鋪張家生藥

鋪獅子巷口徐家紙劄鋪凌家刷牙鋪觀復丹室保佑坊前孔家頭中鋪張賣食麵店張官人諸史子文籍鋪訥菴丹砂熟藥鋪俞家七寶鋪張家元子鋪中瓦子前徐茂之家扇子鋪陳直翁藥鋪梁道實藥鋪張家豆兒水錢家乾果鋪金子巷口陳花腳麵食店傅官人刷牙鋪楊將領藥鋪市南坊沈家白衣鋪徐官人幞頭鋪鈕家腰帶鋪市西坊北鈕家綵帛鋪張家鐵器鋪脩義坊北張古老胭脂鋪水巷口戚百乙郎顏色鋪徐家絨線鋪阮家京果鋪俞家冠子鋪官巷前仁愛堂熟藥鋪脩

義坊三不欺藥鋪官巷北金藥白樓太丞藥鋪胡家馮家粉心鋪染紅王家胭脂鋪淮嶺傾錫鋪清河坊顧家綵帛鋪蔣檢閱茶湯鋪昇陽宮前仲家光牌鋪季家雲梯絲鞋鋪太平坊南倪沒門麵食店南瓦子北卓道王賣麵店腰棚前菜麵店熙春樓下雙條兒剗子店太平坊大街東南角蝦蟆眼酒店漆器墻下李官人雙行解毒丸抱劍營街吳家夏家馬家香燭裏頭鋪李家絲鞋鋪許家槐簡鋪沙皮巷孔八郎頭巾鋪陳家條結鋪朝天門戴家麀肉鋪外沙皮巷口雙葫蘆眼藥鋪朝天門

裏大石版朱家裱褙鋪朱家元子糖蜜糕鋪太廟前尹
家文字鋪陳媽媽泥面具風藥鋪大佛寺疔藥鋪保和
大師烏梅藥鋪三橋街毛家生藥鋪柴家絨線鋪姚家
海鮮鋪壩橋榜亭側朱家饅頭鋪石榴園倪家犯鮓鋪
張省幹金馬杓小兒藥鋪三橋河下楊三郎頭巾鋪清
湖河下戚家犀皮鋪里仁坊口游家漆鋪李博士橋鄧
家金銀鋪汪家金紙鋪炭橋河下青篋扇子鋪水巷橋
河下針鋪彭家温州漆器鋪沿橋下生帛鋪郭醫產藥
鋪住大樹下橋園亭文籍書房平津橋沿河布鋪黃草

鋪温州漆器青白磁器鐵線巷籠子鋪生絹一紅鋪薦
橋新開巷元子鋪官巷內飛家牙梳鋪齊家歸家花朵
鋪盛家珠子鋪劉家翠鋪馬家宋家領抹銷金鋪沈家
枕冠鋪小市裏舒家體真頭面鋪周家摺撲扇鋪陳家
畫團扇鋪自大街及諸坊巷大小鋪席連門俱是卽無
虛空之屋每日清晨兩街巷門浮鋪上行百市買賣熱
鬧至飯前市罷而收蓋杭城乃四方輻輳之地卽與外
郡不同所以客販往來旁午于道曾無虛日至于故楮
羽毛皆有鋪席發客其他鋪可知矣其餘坊巷橋道院

落縱橫城內外數十萬戶口莫知其數處處各有茶坊
酒肆麪店果子綵帛絨線香燭油醬食米下飯魚肉養
腊等鋪蓋經紀市井之家往往多于店舍旋買見成飲
食此爲快便耳

天曉諸人出市

每日交四更諸山寺觀已鳴鐘菴舍行者頭陀打鐵板
兒或木魚兒沿街報曉各分地方若晴則曰天色晴明
或報大參或報四參或報常朝或言後殿坐陰則曰天
色陰晦雨則言雨蓋報令諸百官聽公上番虞候上名

衙兵等人及諸司上番人知之趕趁往諸處服役耳雖
風雨霜雪不敢缺此每月朔望及遇節序則沿門求乞
齋糧最是大街一兩處麪食店及市西坊西食麪店通
宵買賣交曉不絕緣金吾不禁公私營幹夜食于此故
也御街鋪店聞鐘而起賣早市點心如煎白腸羊鵝事
件糕粥血臟羹羊血粉羹之類冬天賣五味肉粥七寶
素粥夏月賣義粥餛飩子豆子粥又有浴堂門賣面湯者
有浮鋪早賣湯藥二陳湯及調氣降氣並丸劑安養元
氣者有賣燒餅蒸餅糝糕雪糕等點心者以趕早市直

至飯前方罷及諸行鋪席皆往都處侵晨行販和寧門
紅杈子前買賣細色異品菜蔬諸般噶飯及酒醋時新
果子進納海鮮品件等物填塞街市吟叫百端如汴京
氣象殊可人意孝仁坊口水晶紅白燒酒曾經宣喚其
味香軟入口便消六部前丁香餛飩此味精細尤佳早
市供膳諸色物件甚多不能盡舉自內後門至觀橋下
大街小巷在在有之不論晴雨霜雪皆然也

夜市

杭城大街買賣晝夜不絕夜交三四鼓遊人始稀五鼓

鐘鳴賣早市者又開店矣大街關撲如糖蜜糕灌藕時
新果子像生花果魚鮮豬羊蹄肉及細畫絹扇細色紙
扇漏塵扇柄異色影花扇銷金裙段背心段小兒銷金
帽兒逍遙巾四時玩具沙戲兒春冬撲賣玉柵小毬燈
奇巧玉柵屏風捧燈毬快行胡女兒沙戲走馬燈鬧蛾
兒玉梅花元子槌拍金橘數珠糖水魚龍船兒梭毬香
鼓兒等物夏秋多撲青紗黃草帳子挑金紗異巧香袋
兒木犀香數珠梧桐數珠藏香細扇茉莉盛盆兒帶朵
茉莉花朵挑紗荷花滿池嬌背心兒細巧籠仗促織籠

兒金桃陳公梨炒栗子諸般果子及四時景物預行撲
賣以爲賞心樂事之需耳衣市有李濟賣酸文雀官人
相字攤梅竹扇面兒張人畫山水扇並在五間樓前大
街坐鋪中瓦前有帶三朵花點茶馮馮敲響盞撥頭兒
拍板大街遊玩人看了無不哂笑又有鰕鬚賣糖福公
个背張馮賣糖洪進唱曲兒賣糖又有擔水斛兒內魚
龜頂傀儡面兒舞賣糖有白鬚老兒看親箭撥鬧盤賣
糖有標草十樣賣糖效學京師古本十般糖賞新樓前
仙姑賣食藥又有經紀人擔瑜石釘鉸金裝架兒共十

架在孝仁坊紅杈子賣阜兒膏澄沙糰子乳糖澆壽安
坊賣十色沙糰衆安橋賣澄沙膏十色花花糖市西坊
賣蝸螺滴酥觀橋大街賣豆兒糕一作膏輕錫太平坊賣
麝香糖蜜糕金鋌裹蒸兒廟巷口賣楊梅糖杏仁膏薄
荷膏十般膏子糖內前杈子裏賣五色法豆使五色紙
袋兒盛之通江橋賣雪泡豆兒水荔枝膏中瓦子前賣
十色糖更有瑜石車子賣糖糜乳糕澆亦俱曾經宣喚
皆效京師叫聲日市亦買賣又有夜市物件中瓦前車
子賣香茶異湯獅子巷口燒耍魚罐裏燒雞絲粉七寶

科頭中瓦子武林園前煎白腸鳩腸灌肺嶺賣輕錫五
閒樓前賣餘甘子新荔枝木檐市西坊賣焦酸餡千層
兒又有沿街頭盤叫賣薑豉膘皮牒子炙椒酸犯兒羊
脂韭餅糟羊蹄糟蟹又有擔架子賣香辣罐肺香辣素
粉羹腊肉細粉科頭薑蝦海螯鮓清汁田螺羹羊血湯
胡灌海螯螺頭灌餛飩兒灌麪等各有叫聲大街更有
夜市賣卦蔣星堂玉蓮相花字青霄三命玉壺五星草
窻五星沈南夫五星簡堂石鼓野巷五星泰來心鑑三
命中瓦子浮鋪有西山神女賣卦灌肺嶺曹德明易課

又有盤街賣卦人如心鑑及甘羅次北算子者更有叫
時運來時買庄田取老婆賣卦者有在新街融和坊賣
卦名桃花三月放者其餘橋道坊巷亦有夜市撲賣果
子糖等物亦有賣卦人盤街叫賣如頂盤擔架賣市食
至三更不絕冬月雖大雨雪亦有夜市盤賣至三更後
方有提瓶賣茶冬閒擔架子賣茶餽子慈茶始過蓋都
人公私營幹深夜方歸故也

諸色雜貨

凡宅舍養馬則每日有人供草料養犬則供餵糠養貓

則供魚鱸養魚則供蟻蝦兒若欲喚錮路釘鉸修補鍋
銚箍桶脩鞋脩僕頭帽子補脩魷冠接梳兒染紅綠牙
梳穿結珠子脩洗鹿胎冠子脩磨刀剪磨鏡時時有盤
街者便可喚之且如供香印盤者各管定鋪席人家每
日印香而去遇月支請香錢而已供人家食用水者各
有主顧供之亦有每日掃街盤垃圾者每支錢犒之其
巷陌街市常有使漆修舊人荷大斧斫柴閒早脩扇子
打蠟器脩竈提漏供香餅炭擊并挑擔賣油賣油茗掃
帚竹筴筴雞籠擔聖堂拂子竹柴茹紙生薑薑芽新

薑瓜茄菜蔬等物賣泥風爐小缸竈兒天窗砧頭馬杓
銅鐵器如銅銚湯餅銅罐熨斗火鋏火筋火夾鐵物漏
杓銅沙鑼銅匙筋銅瓶香爐銅火爐簾鉤鐵器如罇榼
果盆果盒酒盞注子偏提盤孟杓酒市急須馬孟屈卮
滓斗筋瓶家生動事如桌橈涼牀交椅兀子長挑繩牀
竹椅柎笄裙厨衣架棊盤面桶項桶腳桶浴桶大小提
桶馬子桶架木杓研槌食托青白瓷器甌碗碟茶盞菜
盆油杆杖榻轆鞋植棒槌烘盤雞籠蟲蟻籠竹笊籬蒸
籠筴箕甌筲紅簾斑竹簾酒絡酒籠筴箕瓷髻炒鏝砂

盆水甌烏盆三腳罐枕頭豆袋竹夫人懶架涼簟藁薦
蒲合席子及文具物件如硯子筆墨書架書攀裁刀書
剪簿子連紙又有鏡子木梳篦子刷子刷牙子減裝墨
洗漱孟子冠梳領抹針線與各色麻線鞋面領子腳帶
粉心合粉胭脂膠煤托葉墜紙等物又有挑擔擡盤架
買賣江魚石首鮓魚時魚鮓魚鰻魚鱈魚鯽魚白鰕魚
白蟹河蟹河蝦田雞等物及生熟豬羊肉雞鵝鴨及下
飯海腊養膘鴨子炙鮓糟藏大魚鮓乾菜乾蘿蔔菜蔬
葱薑等物又有早閒賣煎二陳湯飯了提瓶點茶飯前

有賣饊子小蒸糕日午賣糖粥燒餅炙焦饅頭炊餅辣
菜餅春餅點心之屬四時有撲帶朶花亦有賣成窠時
花插瓶把花柏桂羅漢葉春撲帶朶桃花四香瑞香木
香等花夏撲金燈花茉莉葵花榴花梔子花秋則撲茱
莉蘭花木樨秋茶花冬則撲木春花梅花瑞香蘭花水
仙花臘梅花更有羅帛脫蠟像生四時小枝花朶沿街
市吟叫撲賣及買賣品物最多不能盡述及小兒戲耍
家事兒如戲劇糖果之類行嬌惜宜娘子鞦韆稱糖葫
蘆火齋郎果子吹糖麻婆子孩兒等糕粉孩兒鳥獸像

生花朵風糖餅十般糖花花糖荔枝膏縮砂糖五色糖
線天戲耍孩兒雞頭擔兒罐兒樸兒蠟小酒器鼓兒板
兒鑼兒刀兒鎗兒旗兒馬兒鬧竿兒花籃龍船黃胖兒
麻婆子橋兒棒槌兒及影戲線索傀儡兒獅子貓兒又
沿街叫賣小兒諸般食件麻糖鎚子糖鼓兒錫鐵麻糖
芝麻糖小麻糖破麻酥沙團箕豆法豆山黃褐青豆鹽
豆兒豆兒黃糖楊梅糖荊芥糖樵子蒸梨兒棗兒米食
羊兒狗兒蹄兒蟹兒栗糗豆團糝糕麻團湯團水團湯
丸餠蝕兒炊餅槌栗炒槌山裏棗山裏果子蓮肉數珠

苦槌荻蔗甘蔗茅洋跳山婆栗茅蜜屈律等物並于小
街後巷叫賣遇新春街道巷陌官府差顧淘渠人沿門
通渠道路污泥差顧船隻搬載鄉落空閒處人家有泔
漿自有日掠者來討去杭城戶口繁夥街巷小民之家
多無坑廁只用馬桶每日自有出糞人灑去謂之傾腳
頭各有主顧不敢侵奪或有侵奪糞主必與之爭甚者
經府大訟勝而後已

夢梁錄卷十三

